



TUNKU AMPUAN NAJIHAH melihat album gambar kejayaan Usim, sambil diperhatikan **Abdul Shukur** (kanan) dan **Muhamad** (dua dari kanan), selepas melancarkan aktiviti sambutan ulang tahun ke-10 Usim di Nilai, baru-baru ini.

Usim sasar universiti Apex, enrolmen 16,000 pelajar

Oleh **Khairina Yasin**
kayrina@bharian.com.my

UNIVERSITI Sains Islam Malaysia (Usim) meletak sasaran enrolmen 16,000 pelajar, selain mencapai status universiti Apex, dalam tempoh sedekad lagi.

Pengerusi Lembaga Pengarahnya, Tan Sri Dr Mohamad Yusof Md Nor, berkata kini universiti pelopor pendidikan berteraskan Pengajian Islam itu berkembang pesat dengan lebih 5,500 pelajar.

"Kita juga berazam berdiri setanding dengan institusi pengajian tinggi awam lain dengan mencapai status universiti Apex," katanya pada majlis pelancaran aktiviti sempena sambutan ulang tahun ke-10 Usim yang disempurnakan Canselornya, Tunku Ampuan Najihah Tunku Besar Burhanuddin, di Nilai, baru-baru ini.

Hadir sama, Naib Canselor Usim, Prof Datuk Dr Abdul Shukur Husin dan Timbalannya, Prof Datuk Dr Muhamad Muda.

“ Kita juga juga berazam berdiri setanding dengan institusi pengajian tinggi awam lain dengan mencapai status universiti Apex

Dr Mohamad Yusof Md Nor
Pengerusi Lembaga Pengarah Usim

Sejak penubuhan Usim sedekad lalu, beliau berkata, universiti itu dikenali sebagai institusi pengajian tinggi Islam berwawasan memartabatkan kecemerlangan ilmu dan insan yang mampu melahirkan graduan berkualiti dan relevan dengan keperluan semasa.

Katanya, antara fokus utamanya ialah memperkukuh dan membangunkan program akademik berkualiti tinggi dan

setanding institusi pengajian tinggi awam lain.

Mohamad berkata, hasrat penubuhan Usim yang dulunya dikenali sebagai Kolej Universiti Islam Malaysia adalah bagi memenuhi keperluan kerajaan mengurangkan kebergantungan pelajar negara ke Timur Tengah, terutama dalam bidang Pengajian Islam.

Mengenai sambutan ulang tahun universiti itu, lebih 40 aktiviti dijalankan mulai September lalu hingga Julai tahun depan.

Antaranya Pameran Khas Usim 10 Tahun dan Pertandingan Mooting Undang-undang Syariah Kebangsaan bulan depan, pelancaran Buku Khas 10 Tahun Usim Melakar Gemilang (Februari 2010) dan Pertandingan Tafsir al-Quran Peringkat Universiti Se-Malaysia (April 2010).

Sementara acara kemuncak perasmian Ulang Tahun Ke-10 dijadual disempurnakan Perdana Menteri, Datuk Seri Najib Razak, di kampus induknya di Nilai, pada Mei tahun depan.